

## Tog'ay Murod (1948-2003)



## Tog'ay Murod (1948-2003)



Tog'ay Murod (taxallusi; asl ism-sharifi Mengnorov Tog'aymurod) (1948.3.2, Surxondaryo viloyati Denov tumani Xo'jasoat qishlog'i — 2003.27.5, Toshkent) — O'zbekiston xalq yozuvchisi (1999). Toshkent davlat universitetining jurnalistik fakultetini tugatgan (1972).

Respublika radiosida muharrir (1972—75), «O'zbekiston fizkulturachisi» gazetasida (1976—78), «Fan va turmush» jurnalida (1982—84) adabiy xodim bo'lib ishlagan. 1984—86 yillarda Moskvada Oliy adabiyot kursida o'qigan.

Dastlab kichik hikoyalari, ocherklari e'lon qilingan. Birinchi yirik qissasi — «Yulduzlar mangu yonadi» (1976). «Ot kishnagan oqshom» (1979), «Oydinda yurgan odamlar» (1980), «Momo Yer qo'shig'i» (1985) qissalarida qishloq hayotiga xos manzaralar aks etgan. Ularda halol, oqko'ngil, to'g'riso'z, mard o'zbek kishilarining betakror obrazlari yaratilgan. O'zbek adabiyotining yutug'i sifatida e'tirof etilgan bu qissalar tilining shoirona jozibadorligi, xarakterlarning yorqinligi, milliy ruhi bilan ajralib turadi.

«Oydinda yurgan odamlar» qissasi qahramonlari Qoplon va Oymomo farzand orzu-ilinjida kun, oy, yillarni bir-biriga ulab yashashadi. Hali tug'ilimgan bolaning bobosi, momosi bo'lib, surriyotni, bir-birlarini ardoqlashadi. Asar qahramonlari fojeasi umid va yorug'likka to'la mungli, hazin qo'shiq qilib kuylanadi. Mazkur asar uchun adib Oybek mukofotiga sazovor bo'lgan.

«Momo yer qo'shig'i» qissasida o'z g'oyasi va uslubi bilan o'zga qissalardan ajralib turadi. Unda milliy

zamindan oyog'i uzilgan, Vatan tuprog'ida yashab, yuragida yurt tuyg'usi bo'limgan kishilarning obrazlari g'arb adabiyoti sig'indi bandasi bo'lib qolgan ijodkor misolida o'zbekona kinoya bilan tasvir etiladi.

Tog'ay Murod o'zbek va jahon adabiyotining eng yaxshi an'analarini muvaffaqiyat bilan davom ettirgan. «Otamdan qolgan dalalar» (1993) romanida O'zbekistonning mustamlakaga aylanishi va tunu kun mehnat qilib, yashayotgan o'zbek dehqonlarining mustabid tuzum yillaridagi og'ir hayoti, iztiroblari hayotiy lavhalarda haqqoniy chizib berilgan. Asardagi Dehqonqul o'zbek mehnatkashlarining umumlashgan obrazi darajasiga ko'tarilgan. U boshiga yog'ilgan minglab musibatlarga chidab yashashga majbur bo'lsa-da, o'z insoniy sha'ni, qadrqimmatini baland tutadi, mustamlakachilarining yugurdaklarini ayovsiz fosh etadi. Asar asosida badiiy film yaratilgan (2001). Yozuvchi 1994 yil "Otamdan qolgan dalalar" romani uchun Abdulla Qodiriy nomidagi Davlat mukofoti bilan taqdirlangan.

«Bu dunyoda o'lib bo'lmaydi» romanida ham o'z ijodiy mezonlariga sodiq qolib, yolg'on e'tiqodlar, soxta shiorlarga aldanib, hayotini yelgasovurgan sobiq firqa rahbarlarining majoziy obrazlarini hajviy bo'yoqlarda tasvirlagan.

Vafotidan so'ng "Tanlangan asarlar"i (1-jild, 2008; 2-jild, 2012) chop etilgan.

Tog'ay Murod Jek Londonning «Boyning qizi» dramasi va hikoyalarini, E. Seton-Tompsonning «Yovvoyi yo'rg'a» qissasini o'zbek tiliga tarjima qilgan.

2023-09-25 21:20:26